

15. oktober 2004

UKA 2004/29

**Meeqqanik inuusuttunillu ikiorsiisarneq pillugu Inatsisartut peqquataata  
allanngortinneqarneranik Inatsisartut peqqussutissaattut siunnersuut**  
(Tassanngaannartumik inissiinnermut tunngavissarititap erseqqissarneqarnera)

**pillugu**

**Inatsisartut Ilaqutariinnermut Peqqissutsimullu Ataatsimiititaliaata**

**ISUMALIUTISSIISSUTAA**

**Siunnersuutip aappassaaneerneqarnerani saqqummiunneqartoq**

Inatsisartut ataatsimiititaliaat suliarinninnermini ukuningga inuttaqarpoq:

Inatsisartunut ilaasortaq Enos Lyberth, Siumut, siulittaasoq  
Inatsisartunut ilaasortaq Agathe Fontain, Inuit Ataqtigiit, siulittaasup tullia  
Inatsisartunut ilaasortaq Doris Jacobsen, Siumut  
Inatsisartunut ilaasortaq Godmand Rasmussen, Atassut  
Inatsisartunut ilaasortaq Astrid Fleischer Rex, Demokraatit

Inatsisartut Ilaqutariinnermut Peqqissutsimullu Ataatsimiititaliaata UKA 2004-mi  
siullermeerinerup kingorna siunnersuut nassuiaatitai ilanngullugit misissorpaa.

**Ataatsimiititaliap aallarniutitut oqaaseqaatai:**

Tassanngaannartumik inissiissarnermut tunngatillugu apeqqutit Naalakkersuisunit  
qaqqinneqarnerat Inatsisartut Ilaqutariinnermut Peqqissutsimullu  
Ataatsimiititaliaannit assorsuaq iluarisimaaneqarpoq, inatsimmimi pineqartumut  
tunngasut erseqqissaavigineqarsimannigitsut paasinarsisimammat.  
Tassanngaannartumik inissiisariaqalernerup qanoq ingerlanneqartarnissaa pillugu  
erseqqissunik maleruagassaqaarnissaq pingaaruteqartutut ataatsimiititaliamit  
isigineqarpoq.

Sumiginnaaneq pillugu ajornartorsiutit nunatsinni innuttaasunit  
eqqumaffigineqarput. Meeqqat inuusuttullu piginnaatitaaffiisa isumagineqarnissaat  
Kalaallit Nunaata akisussaaffigai. Angajoqqaatut oqartussaassusilinnit  
sumiginnarneqarpata inuiaqatigiit ikiuuttussaataapput, taamaaliussappullu  
meeqqamat pitsaanerususaaq aallaavigalugu.

Siunnersuummik suliarinninnermut atatillugu oqaaseq "annertuumik" § 18, imm. 1-imi ilaatineqartariaqarnersoq ataatsimiititaliap oqaluuseraa.

Siunnersuut ataatsimut isigalugu ataatsimiititaliamit amerlanerussuteqartumit tapersorsorneqarpoq, ikinnerussuteqartorli Demokraatineersoq isumaqarpoq § 18, imm. 1-imi oqaaseq "annertuumik" peerneqartariaqartoq.

Kiisalu siuliani taaneqartut tunngavigalugit Ilaqutariinnermut Peqqissutsimullu Naalakkersuisoq Asii C. Narup siunnersuummik ataatsimiititaliap suliaqarneranut atatillugu ataatsimiititaliami isumasioqatigalugu ataatsimeeqatigineqarpoq.

Isumasioqatigiilluni ataatsimiinnissamut aggersaassut Naalakkersuisunilu ilaasortap oqaasissaasa allattorsimaffiat isumaliutissiissummut matumunnga ilanngussatut ilanngunneqarput.

**Ataatsimiititaliami amerlanerussuteqartut Siumut, Inuit Ataqatigiit og Atassullu siunnersut pillugu ima oqaaseqaateqarumapput:**

Oqaaseq "annertuumik" siunnersuummi ilaatinneqassanersoq paasinarsitikkumalluni isumasioqatigiilluni ataatsimiinnissaq pisariaqarsinnaasoq siunnersuummik siullermeerinermi oqaatigineqarpoq.

Siunnersuutip § 18-iani oqaasertaliussat allanngortinneqarnissaannut tunngavissaqanngitsoq amerlanerussuteqartut isumaqarput.

**Tamanna tunngavigalugu siunnersuut maanna ilusimisut iluseqartillugu akuersissutigineqassasoq ataatsimiititaliami amerlanerussuteqartut siuliani taaneqartut inassutigaat.**

**Ataatsimiititaliami ikinnerussuteqartoq Demokraatineersoq siunnersuut pillugu ima oqaaseqaateqarumavoq:**

Oqaaseq "annertuumik" siunnersuutip § 18, imm. 1-ianit peerneqartariaqartoq Demokraatit isumaqarput. Pineqartut annertusinerisigut ilaqtariinnut inuussutissarsiutigalugu paarsisartunut, meeqqap inuusuttulluunniit piumasqaataanik pisariaqartitaanillu naammassinnissinnaanngitsunut, meeqqamik inuusuttumilluunniit inissiisoqarsinnaanera aarleqqutigineqarsinnaanera tamatumunnga tunngavilersuutigineqarpoq.

Annertuumilli sumiginnakkat piumasqaataannik pisariaqartitaannillu isumaginninnissamut paaqqinniffik atortorissaaruteqarlunilu tamakkiisumik piginnaanilinnik sulisulik naleqqunneruvoq. Taamaattumik meeqqat annertuumik sumiginnakkat ilaqtariinni inuussutissarsiutigalugu paarsisartuniinnatik ulloq unnuarlu paaqqinniffinniittariaqartut Demokraatit isumaqarput.

**Tamanna tunngavigalugu allannguutissatut siunnersuummik tamatumunnga naapertuuttumik Naalakkersuisut saqqumiussinisaat ataatsimiititaliami ikinnerussuteqartup siuliani taaneqartup kaammattuutigaa.**

Taama oqaaseqarluni Inatsisartut Ilaqutariinnermut Peqqissutsimullu  
Ataatsimiititaliaata siunnersuut aappassaaniigassanngortippaa.

Enos Lyberth, Siulittaasoq

Agathe Fontain, siulittaasup  
tullia

Astrid Fleischer Rex

Godmand Rasmussen

Doris Jacobsen

[Ilanngussaq 1](#)

Ilanngussaq 2 (Qarasaasiatigut pigineqanngilaq)